

ius genera faciunt, prasoidem, atque chrysopteron, similem chrysopraso. Videtur autem eadem & Chrysolampis Plinij: quæ pallidi coloris die est, noctu ignei: qua ratione forsan Epiphanium aliquis defenderit, quasi ad nocturnum eius colorem respexerit.

Pas, פס, Hebræis aurum bonum & purum sonat: etsi quidam gemmas interpretantur, Psalmis 19. & 21. pro quo Cantici Salomonis quinto Mupas, מופס, scribitur, ut citat Munsterus in Hebraico latino Lexico: at Biblia ab ipso edita, eo in loco simpliciter pas, non mupas habent. inuenio & Vpas, פסא, in Lexico trilingui Munsteri, ne scio quàm rectè: à quolibet autem horum Topazij nomen deduci potuit, quod aurum optimum suo colore ac splendore æmulatur. Author est Plinius circa Thebaidis Alabastrum nasci Topazium: unde subit, corruptum esse Epiphaniij hunc locum de Topazio, ὑποδείξαντες ἀλάβαστρον πσιμ, &c.